



28. april 2026

UPA2026/25

Takornariartitsinermik ingerlataqarneq aamma inuussutissarsiutigalugu ingerlatsinermi zonenut immikkoortiterineq il.il. pillugit Inatsisartut inatsisaata allanngortinnissaanut inatsisissatut siunnersuut (Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfik)

Takornariartitsinermik ingerlataqarneq aamma inuussutissarsiutigalugu ingerlatsinermi zonenut immikkoortiterineq pillugit inatsisissatut siunnersuummik saqqummiussinerannut Siumumiit Naalakkersuisut qutsavigaakka. Takornariartitsineq ineriartorteqqissallugu nunatsinni periarfissatsialarujussuvoq. Suliffissanik pilersitsisinnaavoq, ineriartortitsisinnaavoq aammalu periarfissanik nutaanik minnerunngitsumik illoqarfinni mikinerusuni nunaqarfinnilu pilersitsisinnaalluni.

Takornariaqarnerup aqqissuussaannerusumik aammalu piujuartitsisumik ineriartortinneqarnissaanik anguniagaqarnernut Siumut pitsaasumik isiginnippoq. Kisianni uagutsinnut pingaarnerpaavoq, ineriartortitsineq nunatsinnit aallaaveqarluni pissasoq. Takornariartitsinerup annertusiartornissaa kisiat pingaaruteqanngilaq. Taamatulli aamma takornariartitsiviit nunatsinniit pigineqarnissaat pingaaruteqarpoq.

Takornariartitsinerup iluaqutissartai nunarput tamakkerlugu siammarneqarnissaat Siumumit pingaartipparput. Kissaatigaarpullu takornariaqarneq illoqarfinni annerni annermik piunnaarluni, illoqarfinni mikinerusuni nunaqarfinnilu annerusumik ineriartortinneqassasoq. Tassaniippoq suliffissanik pilersitsinissamut aammalu nunaqaannarnissamik nukittorsaanissamut periarfissaq annertoq. Taamaattumik apequtigissavarput, qanoq inatsisip takornariaqarnerup nunarput tamakkerlugu siammarneqarnissaanut ilapittuutaasinnaanera Naalakkersuisut qulakkeersinnaaneraat.

Siumumit aamma immikkut ataatsimik erseqqissumik oqariartuuteqarniarpugut: Nunatsinni takornariartitsineq aallaaviatigut kalaallinit ingerlanneqartariaqarpoq. Apeqquataavoq kia aningaasarsiorneq pilersittarneraa, iluaquteqartullut kiaanera. Kissaanngilarput ineriartortitsineq suliffeqarfinnit nunanit allaneersunit annertusiartuinnartumik nunatsinnit annissuisunit iluaqutigineqarnissaa. Taamaattumik apequtigissavarput, qanoq inatsisip qulakkiissavaa takornariaqarnerup kalaallinit pigineqarnissaa aammalu ingerlanneqarnissaa.

Taamatutaaq Siumumit pingaaruteqartutut isigigaarput, suliffissaqartitsineq nunaqqatitsinniit iluaqutigineqarnissaa. Takornariaqarneq nunatsinni suliffissanik pilersitsissaaq, avataaniit pinnani. Qanoq Naalakkersuisut tamanna piviusumik qulakkeerusuppaat?

Kommunit annertunerusumik oqartussaaffeqalernissaannut Siumut pitsaasumik isiginnippoq. Tamanna alloriarneruvoq pitsaasoq. Kommunit innuttaasut qaninnerpaaffigaat aammalu pissutsit najukkaniittut ilisimallugit. Taamaattumik naleqquppoq takornariaqarnerup ineriartortinneqarnissaanut annertunerusumik kommunit akisussaaffeqarnissaat.

Naggataatigut oqaatigissavara takornariaqarneq nukittoq, piujuartitsisoq aammalu nunatsinni innuttaasunut iluaqutaasoq Siumumit kissaatigigatsigu. Takornariaqarneq suliffissanik pilersitsisoq nunarput tamakkerlugu, kalaallinit pigineqartoq aammalu inuiaqatigiittut naleqartitagut tunngavigalugit ingerlanneqartoq. Siunnersuummi pitsaasunik immikkoortortaqarpoq, kisianni aamma apequtit pingaarutilit arlallit suli akissutissarsineqarnissaat pisariaqartippagut.



Taamaattumik Siumumit siunnersuummut pitsaasumik oqaloqataarusuppugut, taamaattumillu siunnersuut aappassaaneerneqannginnermini inuussutissarsiornermut ataatsimiititaliamut suliarineqarnissaa innersuussutigaarput.

Qujanaq.

Lars Poulsen, Siumut